



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

... ապրիլի 2024 թվականի № ...-Ա

**«ԷՆԵՐԳՈՏԵԽՆԻԿԱ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ  
ԲՈՂՈՔՆ ԱՌԱՆՑ ՔՆՆԱՐԿՄԱՆ ԹՈՂՆԵԼՈՒ ՄԱՍԻՆ**

Հաշվի առնելով, որ՝

1) Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով) 2016 թվականի մարտի 9-ի №41Ա որոշմամբ (այսուհետ՝ Որոշում) հաստատվել է ապագա վարձակալ ընկերության խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման լիցենզիայի պայմանները, որտեղ ամրագրվել են ջրային համակարգը վարձակալության տրամադրելու համար անցկացված մրցույթի արդյունքում ձևավորված բազիսային սակագները և սակագների ճշգրտման մեխանիզմները: Որոշումն ուժի մեջ է մտել 2016 թվականի մարտի 9-ից և անբողոքարկելի է դարձել 2017 թվականի մարտի 10-ից,

2) «Էներգոտեխնիկա» սահմանափակ պատասխանատվությամբ ընկերությունը (այսուհետ՝ Ընկերություն) 2024 թվականի մարտի 18-ի №Է-028 գրությամբ դիմել է Հանձնաժողով՝ խնդրելով չեղարկել Որոշումը,

3) 2024 թվականի մարտի 20-ին հարուցվել է Որոշման վերաբերյալ Ընկերության վարչական բողոքի քննարկման վարչական վարույթ, ինչի վերաբերյալ վերջինիս ծանուցվել է Հանձնաժողովի 2024 թվականի մարտի 20-ի №ԳԲ/34.3-Մ2-2/1153-2024 գրությամբ,

4) «Վարչարարության հիմունքների և վարչական վարույթի մասին» օրենքի (այսուհետ՝ Օրենք) 71-րդ հոդվածի 1-ին մասի «դ» կետի համաձայն՝ վարչական բողոքը կարող է

բերվել գրավոր վարչական ակտում դրա բողոքարկման ժամկետը նշված չլինելու դեպքում վարչական ակտի ուժի մեջ մտնելու օրվանից մեկ տարվա ընթացքում,

5) Օրենք 71-րդ հոդվածի 2-րդ մասի համաձայն՝ բողոքարկման ժամկետները բաց թողնելուց հետո ակտը դառնում է անբողոքարկելի, իսկ բողոքարկման ժամկետը լրանալուց մեկ տարի անցնելուց հետո վարույթի մասնակիցը կորցնում է բողոքարկման ժամկետը հարգելի պատճառներով բաց թողնելու հիմնավորմամբ բողոք բերելու իրավունքը, բացառությամբ այն դեպքերի, երբ բողոք բերելու ժամկետը բաց թողնելը կապված է անհաղթահարելի ուժի առաջացրած հետևանքների հետ,

6) Օրենքի 43-րդ հոդվածի 1-ին մասի «ա» կետի համաձայն՝ անձի և վարչական մարմնի փոխհարաբերություններում ապացուցման պարտականությունը կրում է անձը՝ նրա համար բարենպաստ փաստական հանգամանքների առկայության դեպքում,

7) Օրենքի 73-րդ հոդվածի 2-րդ մասի համաձայն՝ վարչական մարմինը բողոքն ընդունելիս պարտավոր է ստուգել բողոքի համապատասխանությունը Օրենքի 70-րդ հոդվածի պահանջներին և պարզել՝ արդյոք բողոքը բերվել է Օրենքի 71-րդ հոդվածով սահմանված ժամկետում,

8) Օրենքի 73-րդ հոդվածի 3-րդ մասի համաձայն՝ բողոքի վերաբերյալ որոշում կայացնելիս բողոքը թողնվում է առանց քննարկման, եթե դա ներկայացված է Օրենքով սահմանված ժամկետը լրանալուց հետո, և ժամկետը բաց թողնելը, Օրենքի 71-րդ հոդվածի 2-րդ մասով սահմանված կարգով, հարգելի չի ճանաչվել,

9) Բողոքի ուսումնասիրության ընթացքում պարզվել է, որ Ընկերության կողմից Որոշման դեմ բողոք ներկայացվել է 2024 թվականի մարտի 18-ին՝ Օրենքով սահմանված բողոքարկման ժամկետը լրանալուց հետո, և Ընկերությունը չի հիմնավորել անհաղթահարելի ուժի հետևանքով ժամկետը բաց թողնված լինելը,

և հիմք ընդունելով Օրենքի 73-րդ հոդվածի 3-րդ մասը և «Հանրային ծառայությունները կարգավորող մարմնի մասին» օրենքի 19-րդ հոդվածի 2-րդ մասը՝ **Հանձնաժողովը որոշում է.**

1. Ընկերության 2024 թվականի մարտի 18-ի №Է-028 գրությամբ Որոշման դեմ ներկայացված վարչական բողոքը թողնել առանց քննարկման:

2. Սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հայաստանի Հանրապետության վարչական դատարան, և բողոքարկումը չի կասեցնում որոշման գործողությունը կամ կատարումը:
3. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝**

**Գ. ԲԱՂՈՒՄՅԱՆ**

ք. Երևան  
.. ապրիլի 2024թ.